



Kulikuwa na basi moja
tu katika kijiji cha Ebei.
Lilikuwa basi kubwa
lenye rangi ya bluu.
Lilinguruma sana.



Siku moja mamake
Ebei alisema, "Kesho
tutaenda mjini
kununua sare yako ya
shule."



Ebei alifurahi sana.
Kumbe atasafiri katika
lile basi kubwa la bluu!
Usiku huo hakuweza
kulala vizuri.



Mamake alipoenda
kumuamsha, Ebei
alikuwa tayari amevaa.



Ebei na mamake
walienda kwenye kituo
cha basi. Walisubiri lile
basi kubwa la bluu.
Basi halikufika.



Watu wengine walifika
kwenye kituo cha basi.
Wote walilalamika
kuwa basi lilichelewa.
Mmoja aliuliza, "Basi
limetuacha?"

Ebei alikuwa na wasiswasi.
“Tusipokwenda mjini, sitapata sare
yangu ya shule,” aliwaza.






Baadhi yao walikata
tamaa wakarudi
nyumbani. Lakini Ebei
alilia akakataa kurudi.
“Tutasubiri zaidi,”
mamake alimtuliza.



Ghafla, waliskia mngurumo. Wakaona vumbi hewani. Basi lilikuwa linakuja kwa kasi.




Basi halikuwa la bluu
wala halikuwa kubwa.
Basi lile lilikuwa dogo
na jekundu.
Waliosubiri
waliliangalia tu na
hawakuingia ndani.



Dereva aliwaita,
“Ingieni! Ingieni!
Tumechelewa sana
leo.”



Ebei na mamake walikuwa wa kwanza kuingia. Mara wote waliingia ndani ya basi lile dogo jekundu.



Ebei alichungulia dirishani. Aliwaona watu wengi zaidi wakiingia ndani ya basi.



Mara basi likaondoka.
Ebei aliwaona watu
wengine wakikimbia
kulifikia basi. Walikuwa
tayari wamechelewa.



Mamake Ebei
alimuuliza dereva,
“Liko wapi basi kubwa
la bluu?” Dereva
alimjibu, “Samahani
mama, basi la bluu
liliharibika.
Linatengene Kesho
litakuja.”



Ebei hakujali rangi
wala ukubwa wa basi.
Alifurahi kuwa basi lile
lilikuwa linawapeleka
mjini. Hatimaye,
atanunuliwa sare ya
shule.